

li à parso trovar questo expediente, de expedir di qui el suo caschi, et mandarlo a la presentia de la excelentia vostra con sue letere, dechiarandoli le parte restano in difficultà. Parendo mo' a quella, le averà per suo comandamento maraba, sotoscripto de sua mano, a confirmare, a ziò marchadanti rimangino satisfati, et con animo senzier possino ritornar a li trafigi usitadi, piuj presto che cerchar viazo nuovo, del qual li vien fato grandissimi partidi, quali, per esser ben noti a esso magnifico ambador, non volemo altramente particularizar, riportandose a lui, che di tuto è optimamente informato. Aspeteremo adunque la risposta de la excelentia vostra; et come sapientissima et prudentissima, considererà bene la perseverantia et fermeza de questo stado, demonstrada in ogni tempo, con tanta realtà et sincerità, versso quel excellentissimo soldanadego, lo qual non à mai variado, nè in parte alcuna mutà la sua summa benivolentia verso de quello, ne è per mutare, volendo cussi la excelentia vostra, come più a pieno havemo fato intender a l'antedicto magnifico ambador. Quale non dubitemo gli dinoterà el tutto, essendo homo savio et prudente, et che à ben considerato le parole li habiamo dicto in risposta de la ambasata sua, che, per non atediar la excelentia vostra, non replicheremo altramente. El signor Idio, dal qual procede ogni bene, se degni prestar l'auxilio suo in ben adaptar e asestar et tutto, et ispiri vostra excelentia a dar la conveniente punitione a chi n'è stà causa de meter questi schandoli et disturbi, et che à subverli et ruina ogni nostra bona consuetudine, con danno et jactura de l'un et l'altro stado; il che sarà de summa laude et gloria de la excelentia vostra, satisfatione di boni et exterminio di cativi. I anni de la qual pregemo el signor Idio siano molti.

110* Et *ex nunc* sia preso et *firmiter* statuito che, per non disturbar la presente tratatione, de la importantia che ognuno intende, non possi alcun citadin nè subdito nostro, et sia cui esser si vogli, perfino non sia fata altra deliberation per questo consejo, *quovis modo* mandar nè andar in Alexandria, nè in alcun'altra parte de l'Egipto, con merchantie di sorta alcuna, soto pena di perder le robe et bandizà per anni X di questa cità. Di la qual pena, la mità sia di l'acusador, e l'altra mità vadi a l'arsenal nostro, non si posando de quella far alcuna gratia per alcun modo.

† De parte . . . 106
De non . . . 52
Non sinceri . . . 2

Quelli savij, messeno la soprascripta parte, fonno questi qui soto scriti, videlicet:

Savij dil consejo:

Sier Marco Bolani,
Sier Domenego Trivixan, cavalier, procurator,
Sier Alvixe Venier,
Sier Lunardo Mocenigo,
Sier Alvixe da Molin,
Sier Zorzi Corner, el cavalier.

Savij a terra ferma:

Sier Hironimo Capello,
Sier Zorzi Emo,
Sier Zorzi Pixani, dotor, cavalier,
Sier Marco Dandolo, dotor, cavalier,
Sier Antonio Zustignam, dotor.

Savij ai ordeni:

Sier Piero Antonio Morexini,
Sier Andrea da Molin,
Sier Jacomo Boldù,
Sier Nicolò da Mosto,
Sier Anzolo da cha' da Pexaro.

Li auditori fonno:

Sier Piero Balbi,
Sier Alvixe da Molin,
Sier Alvixe Arimondo.

Sora il cotimo di Damasco:

Sier Piero Zen,
Sier Michiel di Prioli,
Sier Nicolò Venier.

Sora il cotimo di Alexandria:

Sier Donà Marzello,
Sier Beneto Cabriel.

Et fo mandà el messo, che era uno caschi, con uno gripo a Corfù, et de li li sia dato una galia sotil fino in Alexandria. Et portò la letera di la Signoria al soldan, bolla d'oro. E insieme con lui Francesco da Monte, de nation cerchasso, fo turziman a Dama-